

UNE LANCE LONGOBARDE CJATADE A BARACÊT

Lucio *PERESSI*

A di la veretât no si trate di une scuvierete resint, anzit no si sa ni cuant che il repert al sedi stât brincât, ni ci lu ves olmât, ni indulâ; si sa nome che la ponte di lance e une piçule schirie di clauts inrusinitîs a son stadis cjatads di une persone di Baracêt di Cosean intai cjamps dal pâis. Il matereâl al fo dât a cui che al scrîf culi cun la prospettive di savê se si tratàs di elements di valôr storic opûr di... feraze.

Cjapât dai impegnis cuotidians, no podei sul moment fâ une ricercje e o pensai par intant di custodi il matereâl cun cure. Nome cul timp a lâ o scomençai a interessâmi, cjapant in man il manualut, une vore interessant, di M. Brozzi sui tiermins tecnicos de archeologjie¹. O viodei cussi che la piche e podeva sei une ponte di lance longobarde de tipologjie “a foglia d’olivo”.

O vei la conferme scrusignint il fundamentâl volum di Brozzi². Mi rindei cont alore che l’arme e podeva sei un significatîf document storic dal nestri teritori, stant che lenti ator di Baracêt – jenfri un rai di vot chilometris (pa la cuâl a une distance minime) – a forin cjatadis testimoniancis longobardis a Rodean Alt, a Cicunins, a San Vît di Feagne (presince di un sepulcrête di un... claut), a Merêt di Tombe (il pais plui dongje), a Visepeute e – po stai – ancje a Turide³. No stin a considerâ po il teritori di un cercli plui larc.

Cuntun significatîf profundiment – ancje su altris publicazions – mi sintii confuartât dal fat che la lance “a foglia d’olivo” e cjatave une

corispuindince cun chês scuvieretis a Savorgnan dal Tor, a Morùs, a San Vît, a Visinâl⁴. Mi sarès plasût fâ un confront ancje su la tipologjie di grandece de ponte cun altris sevi chês “a fuêe di orâr”, ma a mutif de scjarse descrizion (mancjanze di misuis) tes publicazions o tes schedis




Fig. 1. Baracêt, el lûc dal rinvigniment de punte di lance.

dal Museu di Udin e de impossibilitât di cjàpâ vision dai reperts – no podei rindimi cont se si tratàs di une tipologjie a largjie difusion.

Confrontant nome lis “pontis” descritis di C. Somede⁵, o pues di che la nestre e comparis come di medie dimension: lungjece cul bossul 22cm, chê de lame 18; largjece de lame 3,2; spessôr aes gnervaduris 0,7; diametri massim dal bossul 2,1; diametri interni de imbocjadure 1,5. Al è di notâ che e esist ancjemò la foradure dal bossul par fissâ l’aste mediant un claut.

Si à po di fâ presint che la lame si presente in brut stât di conservazion: a scais compatadis cun la tiere e smorseaduris a cause dal rusin.

Stant a lis atribuzions dai nomenâts autôrs a riuart des “pontis” someantis ae nestre, si pues di che jê e po sci dal VII secul e che forsit e podeve partignî a un vucrîr di une comunitât longobarde insedade intai contors: o a Basilian, o a Visepeute, o a San Vît, o a Turide⁶.

No olsi esprimimi su l’ete dai clauts cjatâts, a mutif de dificulât de comparazion e dal ben diferent stât di conservazion⁷. O riten paraltri che chest matereâl nol vedi nuie a ce fâ cun la ponte, siben ch’al sedi stât consegnât insiemit a chê.

Tornant a discori de lance e considerant cierts elements che a fasevin di contor tes sepulturis dai Longobarts, mi son tornadis a la ment sugjerstions che mi son restadis vivis di cuant che gno nonu tes sôs ispezions – cun me frut – ogne tant mi conduseve a talpinâ pes tavielis, stant che lui al jere “guardia campestre” e la mê “guide storiche”⁸. Une di mi fasè – dilunc la stradele di cjàmp che e partive de strade bande Savalons su la rive zampe de renzide dal “paleo-alveo” di un antic flum⁹ – une cubie di doi cjanui blancs (par ‘talian: tubi), che a picavin – fûr dal teren slacât. E jere la zone di creste de gjave di glerie. “Chei li – mi disè – a son i uès di un turc!”.

O restai scaturît. Tant plui che po mi contâ che te sô stale il gruès pidignûl, che al sustignive la trâf purtant dal toglât, al poiave suntuone largie piere scuadrade. Chê – seont lui – al jere il “cussin” dal turc. Chei ricuarts mi son suvignûts leint cualchi descrizion des tombis

longobardis che a vevin un orientament Ovest/Est: cjàf dal cadavar bande Soreli a mont e i pîts bande Soreli jevât. Cussì tes sepulturis di Paluce, di Udin, di Premariâs, di Gradiscje dal Lusinc e di San Vît di Feagne¹⁰.

Mi soi domandât plui tar se chel “cussin” al podeve partignî a chê “tombe” e se i doi “uès” a podessin sei ce ch’al restave di un scarsanali, pal fat che sgjavant la glerie bande Soreli jevât forsit a jerin comparîts prime la piere e tun secont timp i uès. In efiets ancje tal sepulcrêt di Feagne si notâ che lis crepis a poiavin su grues claps¹¹.

Forsit e je une ipotesi azardose chê di meti in relacion la scuvierte de lance cun chei ricuarts, ma bisugne considerâ che gno nonu nol veve une competence te storie furlane: al veve norme il... diplome di seconde elementâr e lis sôs “nozions storichis” a jerin chês de tradizion popolâr. Peint dal país no jere cognossude l’ete longobarde, masse lontane tal timp, e invezit al jere restât vîf l’ataviv rivoc – plui resint – des scorsadis dai Turcs.

Dal rest al puès sei significatîf ancje il lûc de “tombe” pal fat che al jere dongje – come in altris câs – di un percors batût¹², dongje di un país scomparît¹³ e dongje di un grant clapon (par ‘talian: masso erratico) ben evident pe sô altece (pôe su pôe jù doi metris), che al podeve sei un element di identificazion, tant che al jere cognossût de int dal país come “il clap dal gjaul”¹⁴.

Jo culî o ai olsât fâ une suposizion. O lassi ai esperts di scrutinâ altris analogjis par altris situazions. Ben par chel o ai pensât di rindi cheste testimonence e di consegnâ il matereâl al Museu Civic di Udin.

NOTIS

¹ BROZZI 1976.

² BROZZI 1981, pp. 66, 67, 68, 69 e 96.

³ BROZZI 1981, pp. 66, 67, 68, 69 e 96.

⁴ BROZZI 1981, pp. 66-69.

⁵ SOMEDA DE MARCO 1953, pp. 20 e 21.




Fig. 2. La lance longobarde di Baracèt. a- cemùt che si presentave al monent dal rinviçiment; b- dopo el restauro (dis. di G. D. De Tina, foto di C. Marcon).

- ⁶ BROZZI 1989, pp. 33 e 74 e BROZZI 1981, pp. 93 e 96.
⁷ Mi limiti a di che i sis clauts – a sezion cuadrangolâr (massime 0,3/0,4 cm) e di une cierte lungjece (di 6,5 cm a 8,5) – a puartin un cjâf ribatût pluitost svilupât cun slavraduris (di 0,8 cm a 1,5); o zonti che la cjavile – ancje chè a sezion cuadrangolâr (massime 1,4 cm) – e puarte un ciâf iregulâr (diam. massimo 3,5 cm).
⁸ PERESSI 1993, pp. 177-179.
⁹ I studiôs dal '800 a ritignivin che si tratàs dal *Tilaventum Minus* nomenât di Plinius "il Vieli" inte sô opare *Naturalis Historia*.
¹⁰ BROZZI 1981, pp. 63, 67, 68, 72 e SOMEDA DE MARCO 1951-54, p. 190.

- ¹¹ BROZZI 1989, p. 59.
¹² Seont il Brozzi lis tombis a si cjavavin di spes diunc percors batûts.
¹³ PERROSSI 2006, pp. 12-13. Inte cjartine topografiche culi ripuartade dal «Bollettino» il lunc trat dret ch'al passe par Nearêt al indiche il "decumano" de centuriazion romane, il percors marcât a liniutis al segne l'antighe strade "Cividine", il percors scurit al indiche une variant praticade intune etc plui tarde de "Cividine".
¹⁴ Ore presint ogne segnâl di identificazion al è sparît: il "clapon" al è stât puartât vie par caraterizâ un braurôs zardin privât.

BIBLIOGRAFIE DI RIFERIMENT

- BROZZI M. 1969 - *Ritrovamenti longobardi in Friuli*, «Memorie Storiche Forogiuliesi», 49, pp. 114-120.
BROZZI M. 1976 - *Vocabolario dei termini tecnici più comuni ed usati in archeologia*, Centro Regionale di Catalogazione dei Beni Culturali di Villa Manin di Passariano, Udine, s.d. [ma].
BROZZI M. 1981 - *Il Ducato Longobardo del Friuli*, Deputazione di Storia Patria del Friuli, Udine².
BROZZI M. 1989 - *La popolazione romana nel Friuli longobardo (VI-VIII sec.)*, Deputazione di Storia Patria del Friuli, Udine.
MUTINELLI C. 1960 - *La necropoli longobarda di S. Stefano in Pertica in Cividale*, «Quaderno della FACE», 19, pp. 5-51.
PERESSI L. 1993 (pseud. "Lùzio di Cjândit") - *Gno nomu il "storie" di Baracèt*, in *Strolic pal 1994*, Udine.
PERESSI L. 2004 - *Un país scomparit: "Villa de Quarn"*, «Ce fastu?», 80, 2, pp. 273-286.
PERESSI L. 2006 - *Antiche "strade" nel territorio di Nogaredo e Barazzetto*, «Notiziario di Coseano», 2, 2, pp. 233-240.
SOMEDA DE MARCO C. 1944 - *Scoperte archeologiche sul nostro colle di Udine*, «Ce fastu?», 20, pp. 233-240.
SOMEDA DE MARCO C. 1953 - *Scoperta di armi barbariche in Udine*, «Ce fastu?», 29, pp. 20-21.
SOMEDA DE MARCO C. 1951-54 - *Reperti archeologici in Friuli*, «Atti dell'Accademia di Scienze, Lettere ed Arti di Udine», s. VI, 12, pp. 177-194.

Lucio PERESSI
Via Colugna 55
33100 Udine